

摘藻堂四庫全書薈要

集部

欽定四庫全書薈要

集部

御選元詩卷五十三

詳校官原任主事

臣李斯咏

欽定四庫全書蒼要卷一萬八千四百六十五

集部

御選元詩卷五十三

七言律詩十二



張植翁自鳳陽還錢唐賦此以寄

一別於今已五年關河風雨夢相牽  
羨君老有驚人術愧我貧無使鬼錢  
淮雁南來斜作字楚江東下直如弦  
子雲罷獻長楊賦頭白歸來草太玄

秋晚溪行懷張孔叔

松下涼風吹客衣，隔溪煙樹晚依依。  
山空不見孤雲返，落日惟看倦鳥歸。  
世上黃金交態薄，酒邊白髮故人稀。  
別來陡覺成疎闊，況復蕭蕭落葉飛。

送王廷桂還姑蘇

紫馬嬌嘶踏軟沙，闔閭城裏客還家。  
雨添秋水灣灣碧，風趁江雲片片斜。  
惜別緩斟紅麴酒，傷心況對白蘋花。  
雁驚暮角高飛去，先帶離聲過館娃。

劉玉汝

九江逢故人

九江江水抱城迴，洶湧回濤亦壯哉。  
雨散淮濱隨地足，雲移廬阜向天開。  
曳裾鄒子長為客，待詔公孫已擢魁。  
邂逅他鄉急呼酒，樓頭今日早秋來。

黃璋

懷青城先生

虞郎落落不羈客，端如野鶴混雞群。  
興來甫里一杯酒，

與埽匡廬九疊雲遺史尚求丞相事從孫能輯翰林文  
杜陵秀句多家法春樹初生每憶君

王原傑

震澤鎮

村市蕭條數十家扁舟夜泊傍蘆花江空歲晚歸心  
切水遠山長去路賒帶水野田鳴落雁連雲煙樹繞昏  
鴉勞生徒負燈窓志只合西園學種瓜

劉倩玉

中秋對月

十年對月干戈裏，忍向尊前更浩歌。  
光滿又逢新節序，影微難驗舊山河。  
霓裳猶記開元曲，桂籍空懷進士科。  
矯首廣寒宮闕近，欲將消息問嫦娥。

盛景年

和汪以敬

白髮將軍少健強，經旬寂寞卧空床。  
涉江問病出城早，下馬入門聞藥香。  
深院雨晴蒼蘚合，小樓人散綠陰涼。

家書不到看春暮昨夜新裁白苧裳

朱斌

題秀野軒

昔年曾作軒中客今日重題秀野詩  
四檻彩雲晴縹緲  
遶牆蒼雪曉參差  
雨餘山氣侵茶鼎  
風過林香落酒卮  
念我松楸渾咫尺  
倚闌長是不勝思

元愷

德風亭詩



亭下雙旌拂綠莎花邊五馬繫鳴珂挽回天籟秋聲早  
浸澈雲階月色多公退不妨同坐嘯吏閑猶可共吟哦  
阜財解慍南風操時逐絲桐入浩歌

危臺高壓古城闌門外青山畫不真好客每懸徐孺榻  
浣人常避庾公塵槐陰澹澹晨光薄蘋末蕭蕭秋意新  
聞道康衢和靄氣夜來鼓舞及堯民

地控漳東最上遊簷牙高啄白雲秋文窓耀日晴如拭  
翼瓦翔煙曉欲流雅集衣冠儀楚楚遙臨軒旆影悠悠

卷五十三  
階前盈尺容相借收拾新詩入筆頭

月砌雲階背曲廊蘭房桂檼面黃堂簾櫳壓地全無暑  
几席凌空剩有涼畫戟凝香鈴索靜玉虬吐水漏聲長  
文章太守時閑適笑共賓僚酬一觴

四面山拋碧玉環當中亭子勢孱顏九天閭闔登臨外  
五代封疆指顧間白鳥平蕪晴野闊蒼煙喬木夕陽閒  
客來不盡興亡恨吟袖翻風月下還

陳善

奉和東維提學先生春日同閫帥韓侯太守王  
公宴集草元閣席上孩字韻高作聊以塞責錄  
呈同坐諸公發一笑云

嶰竹參差手自栽春明吹上望仙臺水流石澗桃花路  
日湧天門海色開笠澤每移茶竈出鑑湖還棹酒船來  
綺窓午醉醒來晚枕損黃金壓被孩

馬弓

陳檜

古本凌空百尺過根盤如石鐵為柯濃陰不礙金蓮座  
虛籟猶傳玉樹譔倦客解衣頻徙倚老禪卓錫定摩挲  
雲門寺裏梁朝柏身上苔痕想更多

沙可學

詠懷

獨上高城望遠郊雁飛黃葉下蕭蕭天旋西極餘殘照  
江湧狂波作暮潮塵世百年雙鬢改鄉關萬里一身遥  
何由從獵灤河曲霜冷弓強鐵馬驕

黃公望

題關仝層巒秋靄圖

并序

關仝此卷雖祖洪谷子而間以王摩詰筆法融液  
秀潤正其中歲精進之作也人謂有出藍之美詎  
不信夫

群峯矗矗暮雲連  
蘿磴逶迤鳥道懸  
落葉深深門半掩  
疎花歷歷客猶眠  
巖端飛瀑為青雨  
江上歸舟滌碧煙  
應識箇中奇絕處  
昔年洪谷屬君傳

郭忠恕仙山樓觀圖

漢主離宮最上頭  
昔年曾侍翠華遊  
青天半落銀河水  
白日高懸華岳秋  
花隱儀鑾臨閣道  
仗移簫鳳下瀛洲  
三山更在齊州外  
遙望蒼煙九點浮

吳鎮

陸探微負嶠仙遊

梅閣重重翠繞遮  
時時雲氣颭平沙  
千峰樹色藏朝雨  
百道江聲送晚霞  
洞古數留仙子蹟  
溪迴深護羽人家

遨遊每憶無塵地  
咫尺仍堪閱歲華

張僧繇霜林雲岫

六朝畫史知無幾  
吳下僧繇獨擅場  
百疊蒼巒浮障起  
千林紺葉入雲長  
低回野渡鐘聲遠  
寂寞荒村樹影涼  
咫尺披圖更蕭瑟  
短詞何敢遂揄揚

盧鴻仙山臺榭

塵蹤何得此中遊  
無數青山遶殿頭  
爐篆浮烟朝靄靄  
溪雲連樹晚油油  
花香曲徑群麋聚  
芸芷平田獨鶴遊

欲識仙家真樂處一泓清瀨四山秋

黃荃蜀江秋淨圖

暮煙漠漠一江秋疎樹依稀見遠舟風度鐘聲來古寺  
人隨雁影過前洲雲銷碧落天無際波撼蒼山地欲浮  
應識箇中清絕處成都畫史筆端收

李咸熙秋嵐凝翠

雨過秋光映翠微巖雲一抹澹荆扉千山寂寂疎鐘杳  
萬壑蕭蕭落木稀澗水奔飛行路濕松篁迴合野禽歸



征帆點點滄江上應羨山人種蕨薇

叔明松壑秋雲圖

萬壑潏洄磴道長崇岡交互轉蒼蒼疎松過雨虛闌靜  
古木回風曲岸涼村舍幾家門半啓漁梁何處水流香  
扁舟凝望雲千頃不覺西林下夕陽

方方壺畫

城市山林孰是非幽居能與世塵違函關紫氣青牛到  
遼海秋風白鶴歸天鼓叩殘明月墮洞簫吹徹彩雲飛

誰知寂寞江天外長使人間望少微

數載飄蓬事已非荆關咫尺世情違寒雲時向青山抹  
野艇遙從白社歸幾處夕陽人共語一村流水鷺邊飛  
知君紫府歸來後閒把丹青翫翠微

黃鎮成

春日東行

青郊冉冉散晴暉芳樹頻聞一鳥啼山驛水流花落盡  
石田雲暖麥抽齊禪房鑿路當巖半釣屋維舟近竹西

行過野橋人語近尋源應到武陵谿

題秋江把釣圖

獨載輕舸過碧川一綸牽動楚江天蘆邊有月還吹笛  
柳外無風不繫船留火夜然湘岸竹得魚朝送酒家錢  
十年湖海真如畫亦欲狂歌一扣舷

遊麻姑山用蔣師文韻

紫霧龍鸞月裏遊白銀宮殿海中洲麻姑宴罷壇猶在  
葛令丹成井獨留滴雨浮嵐空翠晚飛花散玉瀑簾秋

誰能共食金光草來住仙家十二樓

晚晴書事

白鶴樓西晚雨涼欲晴山氣遠蒼蒼鴉銜落日歸平楚  
雁背殘霞上越陽溪崦築茅堪理釣畬田收禾好休糧  
秋風有約巢雲去却擬狂歌學楚狂

平楚越陽郡  
城二臺名

臨川青雲亭

平野荒荒雉堞低一峰欄檻與雲齊斗牛三尺龍光照  
城郭千年鶴爪題白雨來時江水北青山盡處夕陽西

古來亦有憑高客樹影蒼涼繞大堤

題定武蘭亭

蘭紙香隨玉匣遺寶書天上世難知狼烽幾墮昆明劫  
蟬翼猶傳定武碑曉雨苔花侵擣石秋山柿葉費臨池  
東都已往誰能繼神物終煩謹護持

鼓山靈源洞

有劣崩天風海濤亭喝水巖

劣崩峰頭萬丈梯上方高與白雲齊青山盡處海門闊  
紅日上來天宇低喝水無人空宴坐磨崖有客謾留題

飄然欲御長風去一笑何煩過虎谿

舟過大茅洋

漲海渾茫寄一桴候神東去接方壺帆隨雪浪高還下  
島浸冰天有若無雁影斜翻西日遠潮聲直上晚雲孤  
投綸擬學任公子掣取封鱸飫萬夫

錢塘

雨過高風發屋聲吳中暑退即寒生晴光入眼園林薄  
夜氣侵人枕簟輕寺鐸呼風宵自語鄰機織月曉猶鳴

江湖處處悲秋客  
起東歸袞不待明

贈葉山人

仙巖溪上葉山人  
手佩青囊太古文  
北極地從林邑下  
南條山到蜀江分  
尋源屢識蛟龍宅  
探穴長隨虎豹群  
更約秋風清霽日  
與君高蹋萬重雲

用鷺峰師韻送澗泉上人遊方十首

天台

天台上綵虹橋  
山下桃花帶露飄  
仙客雲霞迷舊路

化人宮殿現層霄穿林夜氣香為蓋冠嶺晨光錦作標  
若到上方應駐錫遙聞法鼓動春潮

雁蕩

雁山鐘磬半空聞雪嶺霞城此地分金塔影浮滄海月  
寶臺光繞梵天雲禪機已熟能傳印世網難嬰易解紛  
更上孤峰看瀑布願將餘瀝湔妖氛

補陀

潮音海洞石盤陀送子東遊奈別何日上扶桑天不遠



雲連析木地無多水王獻寶開丹穴星使通槎泛白波  
見說蓬萊清淺處便從鵬翼起秋河

衡岳

身隨衡岳片雲來南極朱陵洞府開八桂山川臨鳥道  
九疑風雨濕龍堆使華今日嚴珪幣祖印何年剪草萊  
直到無生參學畢逢人遮莫說輪迴

廬山

廬阜山陽幾勝遊竭來重為虎溪留千尋瀑布雲霞冷

九派江流日月浮  
白鹿盤盤高洞曉  
黃花采采故園秋  
東南更有名藍在  
莫道諸方訊已周

五臺

去禮文殊寶刹開  
倚空巒岫鬱崔嵬  
金函奉旨傳香至  
白纓圖形載法來  
心鏡象懸天外月  
教筵獅吼地中雷  
還將拂子閒拈起  
更上繡經第一臺

鍾山

一上鍾山萬慮消  
虛空樓閣翠宮堯  
金陵鬱鬱帝王宅

天塹悠悠南北朝  
月滿石城秋似水  
風高淮浦夜生潮  
未應便作乘蘆去  
且聽仙人碧玉簫

靈隱

路入西山窈復深  
法筵應有聖僧臨  
兩峰塔影天垂蓋  
千佛靈光地布金  
牛笛儻逢圓澤語  
龍宮還見閻仙吟  
空中更上藏雲洞  
水樂泠泠奏八音

峨嵋

峨嵋樓閣現虛空  
玉宇高寒上界同  
茶鼎夜烹千古雪

花幡晨動九天風  
雲連太白開中夏  
日繞重元宅大雄  
師去想無登陟遠  
祇應飛錫驗神通

五山

浮杯東渡海門潮  
鷺嶺元關路匪遙  
十載江湖曾慣歷  
五山風月自相招  
招呼猿洞口行雙  
澗放鶴亭邊入斷  
橋直到妙高峰上  
望曇華天雨滿煙  
霄

送憲幕陳時中分題得平章河

海國相傳利澤功  
滄溟縹緲百蠻通  
潮來估客船歸市

月上人家水浸空  
析木星辰三島外  
搏桑宮殿五雲東  
河梁此日重攜手  
目送靈槎萬里風

陳柏

和王參政崔徽寫真韻

芳時無語惜年華  
綵筆何心賦落霞  
鏡裏自憐人似玉  
天涯不隔貌如花  
雙瞳蘸綠橫秋水  
高結堆春蹕碧鴉  
猶勝無金買延壽  
黑山空使夢還家

錦濟寶克

題徐良夫畊漁軒

白日帶經壠上鋤  
夜間放棹澤中漁  
有米即周鄰舍急  
得魚遠寄故人書  
山川雨露桑麻地  
風月圖書水竹居  
出處不慙徐孺子  
文章能敵馬相如

李存

送倪東江之上元縣主簿

沙頭煙際挹征襟  
嚼盡梅花出短吟  
鄉黨又成千里別  
功名聊盡百年心  
東南形勢風流遠  
吳晉山河蒼莽深

此去吟邊有高邁客尊應與爾同斟

吳景奎

寄題天台楊道士素軒

梨雲漠漠護幽局晏坐冥觀內景清風露洗秋生灝白  
雪霜驚曉眩空明瓊樓奏樂霓裳冷緱嶺吹笙鶴羽輕  
窓戶玲瓏人寂寂碧桃花下步虛聲

登台州巾山

崧嶽雙峰著此身危巔夜半見朝暾天低古塔參雲闕

江送寒潮落海門，  
恰幘風高仙已去。  
翠微僧老鶴長存，  
下觀城郭紅塵隘。  
水色山光自吐吞。

桐灘月夜舟中聞琵琶

湛湛長江上有楓，  
予懷渺渺水雲空。  
未誇湓浦逢商婦，  
賸喜桐灘有釣翁。  
欹枕醉眠秋渚月，  
亂帆爭趁夜潮風。  
曉寒難結思歸夢，  
一尺秋霜壓短篷。

奉送江省都事納克烏裕除湖廣

蟾府秋花滿袖香，  
盱眙遺愛在甘棠。  
紫微幕下除書至，



黃鶴磯頭驛騎忙  
風靜瘴雲消  
嶺海雨新春  
水滿瀟湘  
庾公明月蘇公柳  
兩地高情屬省郎

夢仙

紫鸞邀夢到仙家  
結佩相逢萼綠華  
翠勺細傾千日酒  
蜺旗斜插五雲車  
飛瓊鬢影含清霧  
弄玉簫聲隔彩霞  
杜宇無情驚覺後  
月痕猶在碧桃花

晚霽

雨晴秋氣轉蒼涼  
萬籟依稀奏羽商  
煙抹林腰橫束素

日迴山額半塗黃  
鷓鴣驚曉翅眠池  
草翡翠銜魚立野  
航  
霜蟹正肥新酒熟  
破橙宜趁菊花香

和韻春日

雨香雲澹燕泥融  
珂馬如行罨畫中  
江上數峰浮暖翠  
日邊繁杏倚春紅  
鶯花世界惟消酒  
水榭簾櫳易受風  
陌上行人皆倒載  
未須拍手笑山公

遊絲舞蝶共徘徊  
野鳥空濛拂面來  
風雨一時成晚霽  
園林何處不花開  
江橫羅帶銀鷗起  
雲想衣裳玉女裁

賸喜麻姑能送酒只愁門外索空壘

春思

飛燕腰肢掌上輕塵生羅襪步盈盈鑰魚不寐春無賴  
箏雁頻移曲未成斂黛低鬟初破睡嚼花鶯蕊獨含情  
許身肯作王孫女頭白哀吟對馬卿

舟次丹陽

舟次丹陽成陸走驅車長坂復經丘青山東去連京口  
紅日西沈向石頭客路最嫌難戒曉鄉心生怕雁橫秋

明朝定宿烏衣巷斗酒還澆逆旅愁

自山中歸鑑湖別業

數椽茅舍清江曲六月炎天困鬱蒸  
賴有青山園故宅歸來赤脚踏層冰  
石泉松籟為琴筑野蔌山肴薦豆登  
明日迴頭望丘壑芙蓉半出白雲層

次韻荅錢思復并簡呂彥夫

相逢動是經年別笑指沙鷗聚舊盟  
芳草只添遊子恨清風還有故人情  
薇花亭館春容老木葉林塘晚氣清

杜宇數聲愁不奈朝來白髮鏡中生

寒食

白雪毵鬢影斜風光流轉任年華杯行不惜斟藍尾  
春事如今到楝花車馬羽毛分戰士園林鐘鼓是誰家  
側身北望空迴首愁絕吾生未有涯

夜宿葉孟咨書樓

小樓蕭爽俯平川市井收聲暮景懸雲影消沈山外雨  
月華浮動水中天船舫暝戛層簷底更漏時傳客枕邊

溪友幾番留我宿清談終夕不成眠

席上即事

華筵秩秩宴清宵拊掌歌呼飲興饒  
罵坐灌夫元不屈絕纓楚客去難招  
綠珠嬌小仍吹笛碧玉殷勤且合簫  
待得月斜人散後一杯花露酒初消

陳方

送蔡霞外

不見道人今四載疎狂猶似舊時多  
自言曾到神仙宅

公亦須吟離別歌  
澗草陰陰披紫萸  
山花細細落青蘿  
只愁骨相無清氣  
赤水元珠奈爾何

胡天游

贈余公圖畫樓

高人有眼看山川  
不費從來買畫錢  
萬古丹青垂宇宙  
百川樓觀倚風煙  
人行櫺葉林邊路  
鳥沒蘆花影裏天  
我欲與公添一筆  
寒灘蓑笠釣魚船

牡丹花

相逢盡道看花歸，慙愧尋芳獨後時。  
北海已傾新釀酒，東風猶鎖半開枝。  
掃空紅紫真無敵，看到雲仍未可知。  
但願倚闌人不老，為公長賦謫仙詩。

憶孟兄季弟

兄弟相看各一方，別來俱各鬢成霜。  
江山十里猶比屋，風雨幾番能對牀。  
海燕年深常作客，塞鴻天遠不成行。  
擎杯莫負黃花酒，來看南塘萬竹長。

諷黃蘭谷



雨花風絮兩飄飄興味都非舊寂寥白足懶穿雲外履  
翠簪低按月中簫重拈曉鏡添新髮旋試春衫減舊腰  
金鎖玉函千載恨爭如雲雨自朝朝

陳植

次友仁泊舟虎丘獨步

西丘雨送落花村泱泱溪塘水漲渾樓閣日斜唯影立  
輓轡泉滴尚聲喧無言蒼石空橫道傲世青山不出門  
獨往忽驚春已去題詩猶記刻舟痕

張師曾

汪叔達歸鄱陽

攜書宛句識英翹幾度思親望斗杓歲晚客懷澆鑿落  
雪晴歸路踏瓊瑤驂騑自是輕千里鴻鵠終當在九霄  
此去明年相見日筆端定挽浙江潮

張知言

和吳閒閒送張元谷羽士

得道長生學賀元  
蹇然空谷足音傳  
六龍朝罷香盈袖

獨鶴歸來月滿天  
葉玩山中仙子篆  
書裁圯上老人編  
玉章秀句吳門贈  
好刻琅玕紀歲年

哈尚寶克

題趙彥徵畫赤驥一匹

松雪當年稱獨步  
子孫今日繼遺風  
香凝淡墨連錢碧  
色染秋毫汗血紅  
濟濟奚官顏似玉  
昂昂龍種氣如虹  
春風滿轡初牽出  
對立長鳴冀北空

何景福

鼓角樓

警昏戒曉復司更  
矢棘暈飛結構成  
角韻喚醒晨過客  
鼓聲催動夜巡兵  
龍吟一奏霜飛瓦  
鼉吼三通月滿城  
自是太平無暴客  
金壺漏箭要分明

感興

世途無處不間關  
老我星星兩鬢斑  
江水送潮歸綠渚  
谷風吹雨過黃山  
千金敝袴誰能買  
百石強弓每自彎  
何事無心雲一片  
等閒飛去又飛還

童堯夫招飲回途偶成

東君容我出郊行，過却清明日日晴。  
怕損落花移屐緩，恐妨啼鳥策筇輕。  
春風入髓紅顏暈，世事縈心白髮生。  
花下小車如共載，綠陰深處聽啼鶯。

孫華孫

鳳山懷古

宋家事業如漢晉，遺史班班今尚存。  
南渡衣冠元帝紀，中山廟社靖王孫。  
海門龍去秋潮橫，宮樹烏啼夕燐繁。

已恨無人似諸葛生憎何物學桓溫

項炯

次韻鄧祭酒贈極元無師

麈尾天花灑石扉莫教五色掩摩尼峰頭笑縱金衣鶴  
竹裏閒尋玉版師言論每懷龍井夜扶攜渾似虎溪時  
芝雲更擬分蒲榻黃葉滿山題近詩

潘純

送顧仲父赴廣東市舶提舉

合浦明珠久不還使君風采動群蠻  
鮫人把臂來城裏荔子堆紅出坐間  
江映蕉花鸚鵡綠雨昏榕樹鷓鴣斑  
昔年駿馬經行處父老那知得重攀

吳克恭

元璞過江郊言歸賦七言一首通問

玉山長夏草堂幽老愛從君十日留  
醉語歡呼亂不記歸來爛漫憶相求  
風迴柳線搖歌扇月出荷花映綵舟  
可念江湖搔白首還將衰朽問湯休

劉堧

題章東孟山水

盧家公子稱三絕詩妙書精畫亦工落筆多宗董北苑  
高情不減米南宮天低碧樹春雲合潮滿滄洲暮雨空  
却憶買船同載酒城南山下醉東風

葉頴

題董泰初長江偉觀圖

金焦兩寺出中流北固樓高江上頭畫舫春風過采石



瓊花明月照揚州  
鳳皇飛處青山近  
龍馬來時紫氣浮  
千古登臨興未已  
有人吹笛起沙鷗

徐舫

白雁

出塞風沙不浣衣  
要分秋色占鷗磯  
遠書玉宇傳霜信  
斜落銀箏映冷暉  
楚澤雲昏無片影  
湘江月黑見孤飛  
當年繫帛還蘇武  
漢節仍全皓首歸

閬仙洞

天龍古洞幾年時時雨流酥潤石衣流水桃花春不老  
亂山雲樹翠相依碧雞叫月神魂杳白鶴凌空仙馭飛  
昨日大風環佩響洞賓何處朗吟歸

桐君山

仙馭乘鸞去不停青山依舊抱荒城風香藥草春雲暖  
露冷桐花夜月明縣近故廬堪認姓鶴歸華表自呼名  
千年往事俱塵土時聽樵林吹笛聲

曉上桐君宿霧收嵐光蒼翠恣夷猶丹爐秘訣歸仙子

清景吟懷屬士流  
七里灘橫孤棹影  
立山鐘響五更頭  
古來瀟灑稱名郡  
莫把繁華數汴洲

月色

誤蹋瑤階一片霜  
侵鞦不濕映衣涼  
照來雲母屏無迹  
穿入水晶簾有光  
雪影半窓能共白  
梅花千樹只多香  
故人疑似見顏面  
殘夜分明在屋梁

張小山捐俸重修桐君祠

先生遠有煙霞趣  
鑄玉捐金隱者祠  
瑤草久荒雲一片

碧桐仍見鳳雙枝芙蓉日靜文書暇杖履春來嘯咏遲  
他日幽期何處好寒松花發鶴歸時

清冷山

萬仞寒容尺度量巍然亘古獨蒼蒼三秋風露松梢月  
九夏林泉石上霜堦徑晴煙籠樹白危峯暮靄接天黃  
我遊乘興吟魂爽浪欲騎鵬謁帝鄉

郝天鳳

題董泰初江偉觀圖

揚子江頭昔繫船  
兩山相對湧金蓮  
雲橫殿閣臨無地  
潮打魚龍落半天  
近蹴南徐當北固  
遠吞西蜀跨東川  
披圖更覺襟懷壯  
回首風塵又幾年

楊賢德

題董泰初長江偉觀圖

江水西來東注海  
中流兀出兩峰尖  
層樓倒影波心碎  
列岫堆藍雨後添  
草樹不香寒露濕  
舟帆偏穩晚風恬  
雙龍矯首經年在  
入畫令人看未厭

鄭昂

次復齋登華蓋山

野老憂時淚不乾，海天低燕麥風寒。  
秦關土蝕銅牙弩，漢殿月明金井闌。  
共喜寇恂重借潁，自慙李愿未歸盤。  
江山如畫人如玉，破帽空悲管幼安。

林處士幽居

山籬短短逕斜斜，屋宇三間竹半遮。  
歲饑無僧供菜把，天寒有鶴守梅花。  
武陵流水非秦世，姑孰青山落謝家。

共約春晴草芽動杖藜攜酒踏晴沙

棲遲

棲遲久慕王官谷飄泊仍依謝客巖貧賤誰能從趙孟  
行藏我已卜巫咸冥鴻豈解投矰弋老馬惟思脫轡銜  
却笑杜陵生計拙晚將身世託長鑱

感懷

王粲淒涼仍去國杜陵老大竟飄蓬荊州豈免依劉表  
蜀道終須謁鄭公三禮賦成追昔日七哀歌罷起秋風

青青亦有江南草  
鸚鵡洲邊恨不窮

陸廣

丹臺春曉圖為伯顥畫

十年客邸絕塵紛  
江上歸來思不群  
玉氣浮空春斷雨  
丹光出井曉成雲  
風前龍仗時堪倚  
月下鸞笙久不聞  
幸對仙翁遠孫子  
坐中觀畫又論文

王雨

水竹居



屋枕澄湖地自偏  
水光竹色滿虛簷  
風搖翠雨香浮席  
月送金波影入簾  
閒拂玉琴和鳳吹  
怒吹鐵笛起龍潛  
春時有酒無餘事  
筍熟芹香味可兼

趙次誠

溪居晚酌

主人呼酒開新屋  
綠水遶門光沲寥  
山氣隔溪渾似雨  
沙禽喧浦欲生潮  
江人擊鼓祠荒廟  
野客載花歸斷橋  
拂石閒吟待明月  
茶煙如縷竹蕭蕭

邵光祖

秋興一章錄似良夫

牢落江湖不記年  
擬尋歸計向林泉  
山間買地謀栽橘  
谷口誅茅學種田  
晚節許同樵牧老  
殘書留付子孫編  
秋來喚取陶彭澤  
黃菊花前一醉眠

高文度

石湖寫景

闔閭臺下越來溪  
處處西風颺酒旗  
翠壁丹梯開短軸

黃花紅葉入新詩  
鎔金霜蟹需高價  
蘸甲香醪輒滿卮  
落日去塵驢背穩  
短琴雙笈一童隨

羅蒙正

次韻余觀國招撫江南航海至新會

鴻濛氣接沆瀣天  
夷獠爭迎漢使船  
駭浪千重行處雪  
齊州九點望中煙  
神遊太乙仙藜外  
身在靈生海市邊  
玉署詞華君獨步  
聲名知不愧盧前

舳艫千里快乘風  
百粵三韓去路通  
島樹隱霞春綽約

梅花吹雨曉空濛  
水環鰲極坤維碧  
雲捧蓬萊日色紅  
馳志伊吾鳴劒夜  
中興今待漢臧宮

東宗庚

登善住寺新成閣得江字

高閣新成俯大江  
宏開雄麗控名邦  
宿雲不散連飛棟  
紅日初升射碧窓  
目極蓬萊窮島嶼  
神遊閭闔見旌幢  
群公此日頻登眺  
喜有清吟對怒瀾

題聽春雨軒

階頭燕雨潤流酥  
柳底鷗波已可漁  
斗帳沈香欹枕後  
青燈綺戶把杯初  
不愁泥滑妨過騎  
喜有田歌起荷鋤  
明日雲開花滿眼  
好令童子具籃輿

題陳履元畫玉山草堂圖

玉山草堂江上無  
全勝西莊給事居  
盤內玉芝分食後  
階前珠樹種來初  
詩成綵筆傳金刻  
帙散芸香啓石渠  
敢有新題將遠意  
東吳瞻望重愁予

沈鉉

趙松雪故宅

故國西風王氣銷，珊瑚玉樹半漂搖。  
曾瞻東壁迴天象，故著南冠續漢貂。  
第宅空存森衛戟，墨池乾盡尚蘭苕。  
高情一去風流遠，夢憶簫聲第幾橋。

尤存

送李紫簣歸澱山草堂

積玉溪頭水拍天，草堂只在澱山前。  
鳴鳩啼鳥青春裏，古木疎篁落照邊。  
仙客近傳餐玉法，故人時送買山錢。

相逢未盡一杯酒  
陸相祠前又發船

陸炯

送鄭德和檢討之融水縣令

清朝才士多如雨之子聲華重講筵  
天上玉堂辭聖主嶺南花縣得英賢  
蠻烟秋暗桺榔洞瘴雨春深茉莉田  
莫道衡陽無過雁好題書寄五雲邊

時太初

白燕

春社年年帶雪歸海棠庭院月爭輝珠簾十二中間捲  
玉剪一雙高下飛天下公侯誇紫領國中儔侶尚烏衣  
江湖多少閒鷗鷺宜與同盟伴釣磯

十四夜陪李明府遊海上

秋月照人如白晝樓船浮海坐清空銀山雪屋三更浪  
鼉鼓龍簫萬里風豪氣橫吞雲夢澤醉魂飛墮水晶宮  
雞鳴鐘動失清景驚起東方旭日紅

薛穆



山居寫興寄良夫

萬山深處得幽棲  
四遶岡巒起復低  
野鹿每當花逕歇  
嶺猿常近竹窓啼  
閒來採藥行深壑  
酒醒斟泉就北溪  
為語故人徐有道  
祇應無夢聽朝雞

俞鎬

寄董良用先生

東望雲山翠  
且重煙波咫尺是婁淞  
十年為客荒三迳  
百里憐君住九峯  
把酒每懷彭澤令  
放歌甘作鹿門農

闔閭風景渾非舊愁聽寒山半夜鐘

呂恒

東玉山人

玉山佳處玉人居聞道方壺一事無萬个琅玕巢翡翠  
千年琪樹倍珊瑚瑤臺酒醉金莖露珠閣香燒鵲尾爐  
何日來看金粟景月明花影倩人扶

呂恂

湖光山色樓

水光山色樓千尺老子于中興最多手板時看雲氣好  
吹簫無奈月明何鳳池上客陽春曲鐵笛仙人小海歌  
二月玉山花正好夢隨春水白鷗波

馮濬

湖光山色樓

仙人樓閣禁城東近水憑虛對雪峯香篆寶爐金鵲尾  
酒行仙掌玉芙蓉湖光西下寒仍綠山色春來晚更濃  
媿似登高能領客懸知百尺卧元龍

沈震

懷鐵雅先生

烽火南歸鬢未華  
草元亭在水東家  
綠簣新長參差玉  
璫樹能開頃刻花  
坐按小娃歌白苧  
醉呼稚子整烏紗  
麟洲別業清無暑  
翠盞時浮五色瓜

吳益

靜安八詠

蘆子渡

蘆花開上古蘆城一葉舟從野渡橫江月偏於洲上白  
水風長作雨來聲雁銜霜幹初傳箭龍化冰弦已按箏  
惟有漁家鄰古寺夜深燈火隔溪明

綠雲洞

多羅樹下禮金仙綠錦雲開見碧蓮翠蓋光翻林屋洞  
青霞影倒蔚藍天聽經許對孫思邈訪道期逢葛稚川  
愧我題詩同淨社三生曾是醉逃禪

陶定理

題董泰初長江偉觀圖

浩浩長江勝槩雄  
畫圖形勢記餘蹤  
中流荆楚逾千里  
對峙金焦插兩峰  
天際水光浮日月  
山連雲氣擁虬龍  
北遊猶憶揚州夢  
潮落西津聽晚鐘

張監

題秀野軒圖

予昔遊吳中諸山  
至周氏秀野軒領覽  
天池玉遮之勝  
今數年矣近歸寓  
軒獲觀周侍御之大  
篆朱

提學之新圖恍然若夢遊也景安求予著語聊爾  
塞責耄餘材盡媿無佳語耳

我憶天池與玉遮幽軒水木澹清華笙竽遠振風林竹  
錦綺晴連曉徑花山罽敷牀朝看雨澗泉漱石夜分茶  
番陽大篆睢陽畫不負春陵處士家

李節

寄唐伯慎

鶴林宮裏故人遠謝傳宅前秋水多烏帽吟餘還放棹

黃庭寫罷更籠鵝平頭奴子金盤露皓齒佳人白苧歌  
不得相從渡三泖月明清夜奈愁何

和高以敬韻

別君久見歲華新邂逅相逢亦可人靈鷲峰前看飛瀑  
鶴林宮裏度殘春時時送客傷南浦夜夜占星對北辰  
莫話當時舊遊處落花芳草倍傷神

董成

贈楊太史山居



曾懷荆璞詣天關  
雨露恩深賜佩環  
玉筍遙班躋鳳詔  
金閨通籍侍龍顏  
尚書聽履星辰上  
太史蜚英翰墨間  
厭直承明動歸興  
錦衣光彩照湖山

范致大

自仙源放船來雲林懷元鎮

扁舟蕩槳出東城  
最愛新流拍岸平  
霽雨蘭苔來翡翠  
晚風楊柳送鸝庚  
盈盈溪女臨沙浣  
歷歷郊農傍隴耕  
謬倚林齋望郊郭  
憶君清話不勝情

華廉

陪湖州田府倅採茶行春

聯騎東風踏早霞  
堯山雨過梵王家  
老僧下榻延佳客  
童子開軒埽落花  
竹外披雲尋嫩筍  
茶邊和露摘新芽  
高情重惜春多好  
爭出佳篇詠物華

山中初夏即事

東風不到畫闌邊  
屈指韶光又一年  
處處插秧梅子雨  
家家繅繭竹籬烟  
荷因怕暑先擎蓋  
柳為無寒早褪綿

莫道山中無樂事  
數聲啼鳥落花天

周翼

周履道徵賦梧桐月

雲捲清秋畫角悲  
梧桐滿地月明時  
斜穿翠葉通銀井  
化作金波落硯池  
青女喜驚烏鵲夢  
素娥偏惜鳳皇枝  
故人有約來何暮  
獨立雲階影漸移

題華季充剪韭軒

吳下有田宜種韭  
高風莫笑庾郎貧  
顰飛畫棟青林表

玉洗行盤綠水濱  
夜雨剪來茸自長  
春風吹起綠初勻  
客來一筋分清供  
不與區區肉食人

烏本良

和見心上人寄彥明中丞

去年曾共看芙蓉  
今日秋風落木初  
只道錦幙遊處熟  
豈知金策出林疎  
奉親獨比陳尊宿  
訪客不忘虞秘書  
欲過山中聽軟語  
幾番西望立階除

索駝峯下路幽深  
翠靄飛來白晝陰  
老衲候人登石嶺

中丞問俗到山林睦州蒲向閒邊織秘監詩從定後吟  
月窟天香如昔夢室中談笑想同心

沈懋

題董泰初長江偉觀圖

氣吞荆楚壓秦雄絕險中分阻要衝潮落江心奔萬馬  
山當京口卧雙龍青天欲盡日月小白鳥不飛煙霧重  
猶憶金焦風雨夜翠微深處聽長松

陳敬

次韻暮春即事

淑氣薰人似酒濃  
市橋楊柳自西東  
乍寒乍暖清明候  
時起時眠醒醉中  
黛色有痕顰宿雨  
翠條無力繫春風  
年年飛絮隨流水  
浪作浮萍逐斷蓬

張克問

姚江對月有懷仲遠徵君

百里芙蓉繞曲阿  
錦帆輕颺白鷗波  
月華夜照山河淡  
露氣秋添草木多  
湖上故人成遠別  
天邊鴻雁幾時過

相思兩岸蘋花白回首西風倚棹歌

吳學禮

郭外夜歸

草田高下亂蟲鳴涼襲衣襟夜氣清  
河漢橫秋平野闊山窓無月一燈明  
孤篷倦倚難成夢宿鳥相呼忽轉更  
近郭不分歸近夜到門猶有讀書聲

泊橫春館

枯葑冰消水路遙短長亭下一停橈  
寒煙兩岸客吹曉

殘月小橋人待潮  
山外鐘聲何處寺  
柳邊春入隔年條  
到城不必爭先後  
華蓋峰頭手可招

重過南浦

萬里澄江浸碧天  
迢迢人上渡頭船  
柘煙旋減蠶成繭  
梅雨微晴樹歇蟬  
獨客有愁多近暮  
亂山無處不聞泉  
枳籬門巷依然在  
落莫東風二十年

秋晚書懷

數點寒鴉日又西  
轉寒天色易淒  
迷青山半出烟  
涵郭



紅葉亂流霜滿溪半壁秋燈吟對影故園夜雨夢扶犁  
山人飽聽農歌卧但願年豐穀價低

湖邊會飲

秫價年平易索醪西風野店快持螯門疎楊柳前峰見  
瓦上藤花破屋高時異最傷嫠婦緯歲寒方重故人袍  
小舟待月同歸去橫直沙頭挿短篙

萬石

寄何平子

春風綠草徧天涯恨殺王孫不到家在晉有人書甲子  
避秦無地種桃花世途多險千金散心事難平兩鬢華  
何日脫身塵網外好從仙客學丹砂

桃花渡

江上青青楊柳枝人家萬竹閉柴扉春風應候花爭發  
社雨生寒燕未歸半樹木蘭依岸綠一行鸕鷀背人飛  
濯纓空憶滄浪思不及漁郎有釣磯

郭完

後溪漁隱

漁郎家在清溪曲  
買斷徐潭作釣鄉  
自製蓑衣眠別渚  
故移茶竈上輕航  
荔支林塢水煙煖  
鷓鴣桃花野岸長  
日暮醉歸魚滿筥  
樵青敲火倚疎篁

方炯

莒溪耕隱

莒溪環翠入瓢湖  
古木雲莊即舊居  
每種秫田秋釀酒  
剩收桐子夜觀書  
雪晴度嶺閒騎犢  
客至沿溪旋打魚

老我塵中無隱處借君餘地著茆廬

五十四

題盧賢母卷

樵隱盧君母最賢母儀婦節兩超然相夫德洽周南化  
教子名宜太史編華屋萱蘭春藹藹元堂松桂月娟娟  
時清重隱頒鸞詒百世幽光發九泉

陳維禎

壺山寺

上方臺殿藹蒼蒼及此春遊興倍常看竹解題高士句  
尋山還宿遠公房徑花故點青山色潭雨新經細草香  
欲問虛空身外性鷓鴣啼處又斜陽

御定元詩卷五十三

謹案卷五十三第十五頁後七行納克烏裕舊作


納文郁今改





謹案第三十四頁前七行愧我題詩同淨社刊本  
同訛用據別本元詩改





總校官庶吉士臣侍朝

校對官檢討臣蕭九成

謄錄監生臣朱文佐

欽定四庫全書薈要

集部

御選元詩卷五十四

詳校官原任主事臣李斯咏

欽定四庫全書薈要卷一萬八千四百六十六

集部

御選元詩卷五十四

七言律詩十三

雅勒布哈

春日次宋顯夫韻

帝城三月多春色南陌風光畫不如  
躑躅花深啼杜宇  
鷓鴣灘漲聚王餘  
玉樓似是秦宮宅  
金水元非鄭國渠  
處處笙歌移白日  
揚雄空讀五車書



上尊號聽詔李供奉以病不出奉寄

丹鳳銜書出內庭羽林環衛擁霓旌  
千官拜舞開仙仗四海謳歌荷聖情  
香霧細添宮柳碧日華遙射錦袍明  
侍臣亦有文園病卧聽龍墀鼓吹聲

送趙伯常淮西憲副

東華晨霧正霏霏使者分符向合肥  
封事尚留青瑣闥蒙恩近出紫宸闈  
江涵曉日明樓櫓風引春雲上繡衣  
珍重故人千里別綠尊須盡莫相違

寄姚子中

懶趨青瑣脩朝班  
焚却銀魚挂鐵冠  
琪樹有枝空集燕  
竹花無實謾棲鸞  
漢廷將相思王允  
晉代衣冠託謝安  
聖世只今多雨露  
上林芳草似琅玕

春日宣則門書事簡虞邵菴

三月龍池柳色深  
碧梧煙暖日愔愔  
蜂黏落絮縈青幔  
燕逐飛花避綠沈  
仙仗曉開班玉筍  
雲韶春奏錫瓊林  
從臣盡獻河東賦  
獨有相如得賜金

寄同年宋吏部

金鏡承恩對紫微  
錦韉白馬耀春暉  
謾隨天仗朝天去  
不記宮花壓帽歸  
海國風高秋氣早  
關河雲冷雁聲稀  
嗟予已屬明時棄  
自整綸竿覓釣磯

與蕭存道元帥作秋千詞分韻得香字

芙蓉宮額半塗黃  
雙送秋千出畫牆  
簾底燕驚花雨亂  
樹頭蜂繞襪塵香  
巧將新月添眉黛  
閒倩東風響佩璫  
歸去綠窓和困睡  
暫憑春夢到遼陽



余闕

登太平寺次韻董憲副

蕭寺行春望下方城中雲物變淒涼野人籬落通溝口  
賈客帆檣出漢陽多難漸平堪對酒一尊未盡更焚香  
憑將使者陽春曲消盡征人鬢上霜

汪澤民

四月九日新霽偕宗英公仲自天都峯遊湯泉  
天都負出諸峰上曙色嵐開逸興催半壁暗泉吹冷雨

懸崖飛瀑吼晴雷白雲縹緲仙鄉遠碧落高寒俗駕迴  
自笑生平愛清境冥搜不厭歷崔嵬

鄭玉

題天目山

勢壓東南萬象低溟濛空翠望中迷龍飛鳳舞川原秀  
地下天高日月齊武肅百年鍾霸氣文忠千古欠留題  
客來欲問青雲路鑿破峻嶒便作梯

婺源胡氏屏山樓

樓外青山列翠屏，矮窓放入眼增明。  
丹青花草春描畫，水墨林泉秋寫成。  
變化四時無俗韻，登臨千古有餘情。  
高人對此不容語，獨倚闌干看晚晴。

白嶽

名冠江南第一山，乾坤故設石門關。  
重重煙樹微茫裏，簇簇峰巒縹緲間。  
五夜松聲驚鶴夢，半龕燈影伴人閒。  
忽聞環珮珊珊度，知是神仙月下還。

師山書樓成唐長孺先生賦詩見寄次韻

居山日夕見山容環堵蕭然一畝宮我喜煙雲來几上人看樓閣出空中夜深月色偏明朗曉起嵐光更鬱蔥若比羊裘軒上景臨江惟欠一絲風

董搏霄

遊元雷山

水色山光照眼明隔溪遙見白雲生崖根凍雪留人跡林外春風變鳥聲夢草得詩清入骨煮茶聽話淡忘情飛來橋上歸時晚回首翠微松鶴鳴

俞述祖

送傅與礪廣州教授

扁舟乘興欲還家，分數寧辭瘴海涯。  
未必杜陵成汨沒，由來賈誼擅才華。  
紅蕉遶屋含秋霧，丹荔垂簷炫曉霞。  
萬里何堪慰離思，好憑江驛寄梅花。

吳文讓

戊寅雪後和謝提舉韻

鏞城正月雪初霽，賸得官閒吟嘯中。  
萬國山河開壽域，

九霄風日播春融  
竹依柏樹增新翠  
梅與桃花間小紅  
王化盡無偏黨處  
故教冷暖總相同

燕山秋望

西山木落向高風  
萬壑千崖出梵宮  
翠幕遙看銀牓合  
金精虛逐火輪空  
杓欄靜立脩脩上  
冠佩飛行蕩蕩中  
何日龍船移櫂曉  
露房雲水四簾通

遼海東空鶴不歸  
平蕪遙際極涼霏  
寒天霜靜鵬鷹沒  
沙苑秋高牧馬肥  
落日美人歌玉帳  
西風獵騎擁金羈

豪豬猛起當前立曾冒鳴弓脫曉圍

甲午元旦感懷

春色年年出帝京  
河冰未解柳還青  
東華正擁如雲騎  
南國空瞻戴斗星  
日月由來雙過鳥  
乾坤及此一浮萍  
愁緣底事濃於酒  
起傍梅花步短櫺

甲午六月卧病柔川呈地主

長憶靈巖對卷簾  
客居還此面晴尖  
雨分西崦泉鳴屋  
風借南鄰竹蓋檐  
病寫烏絲清欲苦  
眠拋白羽黑初甜

亂離未覺三遷定行就君平試一占

喬木龍皮絡翠煙昔人成立等升天  
芝蘭玉樹看盈畹駉駉驂駟不受鞭  
垂老託身書滿屋平生好客坐無羶  
諸君有意憐衰白惟有丹青照暮年

楊溪積雨綠於苔亂竹稍稍不遣栽  
自愛水風橫笛語欲乘秋漲刺船來  
眠從朱老詩澆澆書及黃郎使往回  
困餓只餘皮骨在故人初見恐驚猜

王翰



寄別劉子中

問君西去與誰親  
吳楚山川滿目新  
賈傳有才終大用  
杜陵無計豈長貧  
鳳皇臺古思明月  
采石江空夢白蘋  
幾欲西風斟別酒  
不堪零露滿衣巾

和馬子英見寄韻

十年流落向炎州  
判與劉伶作醉遊  
望國孤忠徒自憤  
持身直道更何求  
浮雲往事驚春夢  
落日窮途起暮愁  
賴有故人相憶在  
徧題尺牘海西頭

春日雨中即事

京洛繁華事已違，懷人竟日掩空扉。  
望迷楚岫聞啼鵲，思入秦川怨落暉。  
野館蕭條芳草合，寒江寂寞暮雲飛。  
落花片片隨流水，惆悵關河淚滿衣。

立春有感

故國棲遲去路難，園林此日又冬殘。  
天涯往事書難寄，客裏新愁淚未乾。  
臘雪漸隨芳草變，東風猶笑布袍單。  
堤邊楊柳開青眼，肯傍梅花共歲寒。

巴延

十華觀

十載風塵忽白頭  
春來猶自強追遊  
香浮素碧雲房靜  
日落青林石徑幽  
海內何人扶社稷  
天涯有客卧林丘  
此心只似長江水  
終古悠悠向北流

吳訥

戰昱嶺關

鼓角聲雄隊伍齊  
揚兵曉戰昱關西  
黃金匣動雙龍出

赤羽旗開萬馬嘶  
露布不煩諸將草  
詩篇還效古人題  
沙溪春酒甜如蜜  
醉卧花陰聽鳥啼

東歸

躍馬東歸古歙州  
鐵衣如雪照清秋  
半生叨食君王祿  
百戰深遺母氏憂  
城上綵旗翻白虎  
帳前金絡控黃騮  
英雄出處緣忠孝  
豈為人間萬戶侯

陳謙

梧桐月

琪樹西風露井傍  
鏡寒移影度銀床  
鳳枝清切元疑晝  
鶴夢淒涼不待霜  
點筆詩人題夜綠  
知更宮女怨秋黃  
莫教一葉輕搖落  
珍重千門被耿光

李祁

和詠鶴

老去曾看相鶴經  
暫從華館試伶俜  
幾年養就丹砂頂  
竟日閒梳白雪翎  
萬里壯心原自許  
九霄清唳好誰聽  
神仙舊侶知何在  
遙望蓬萊一點青

次賀琴南韻

茅屋秋風古道傍，衰翁不似去年強。  
漢廷無夢陳三策，楚水空懷賦九章。  
落日亂鴉紅樹老，斷雲孤雁碧天長。  
相思無限關心事，不為催詩急雨忙。

送非空晦之二上人歸青原

青原山氣鬱盤紆，去郭連村十里餘。  
洗鉢水香晨粥後，讀書燈灺曉鐘初。  
晴天小閣收摩衲，煖日輕雲護芡芻。  
願得明年筋力健，徑尋溪路訪深居。

和鍾德恭見寄

江湖風浪日蕭蕭  
鰕蟹魚鰕亂躑跳  
諸葛有才終復漢  
管寧無計漫依遼  
煙消故國川原淨  
秋入空山草木凋  
猶恨歸來相見晚  
暮雲春樹碧天遙

和詠海棠韻

名花初發愛輕陰  
翠袖紅妝新滿林  
步入錦帷香徑小  
醉扶銀燭畫堂深  
妖嬈喜識春風面  
零落愁關夜雨心  
多幸鳳皇池上客  
為抽勞思寫清吟

吳當

潯陽舟中

百年頭上著烏紗一日江邊踏釣槎  
病似相如空有賦貧于杜甫更無家  
漁歌楚楚蒹葭月樵笛村村躑躅花  
事業已隨兵燹盡青門惟守邵平瓜

伏枕移床向小舟江頭漁父問何由  
風波接棹魚龍冷烟草迷津雁鷺秋  
往事幾年懷內顧狂瀾百折任東流  
草元不守揚雄宅垂白空添宋玉愁



三寶珠

遊北湖

一月不來湖上路  
湖邊桃李已成陰  
蒼蒼山色故人面  
蕩蕩風光遊子心  
沽酒樓高斜欲墮  
賣茶船小巧相尋  
自憐鸚鵡洲中客  
手撚江蘼和楚吟

舒穆魯宜孫

妙成觀掀篷和何宗姚韻

結構新亭似勝前  
登臨歷歷瞰晴川  
放懷喜解防秋戍

乘興還操下瀨船從此入林堪避地何妨坐井亦觀天  
東風回首春城暮桃李依然種日邊

林諫

送姪南歸

清秋送姪出都門別淚臨風墮酒尊在客豈無鄉井念  
為官肯負國朝恩鵲鶴飛疾家偏遠鴻雁行稀目欲昏  
獨上居庸最高處回頭一望一銷魂

陳基

秋日雜興

彈鋏歸來歎薄遊  
西風吹老黑貂裘  
裁詩見慰慙錢起  
埽榻相延愧隱侯  
擬學楚人歸種橘  
虛勞蜀客望牽牛  
五湖烟景依然在  
還許扁舟伴白鷗

關山搖落雁飛遲  
江漢飄零有所思  
倦客自憐蘇季子  
故人誰問介之推  
露催絡緯窓間織  
風緝蟪蛄戶外絲  
獨荷慈親念遊子  
倚門日日數歸期

江頭久客日思家  
坐覺微霜上鬢華  
節序又催秋後燕

風光爭發雨前花倦遊已夢莊生蜨不飲何憂廣客蛇  
怪底朝來衣袖薄一川白露下蒹葭

一夕西風木葉飛畫梁落月淡餘輝銀燈夜照還家夢  
金剪秋裁寄遠衣霜信早隨新雁至素書深訝故人稀  
無因為謝東曹掾鱸熟蓴香莫便歸

明河如練月娟娟坐對清光只自憐夜久不知沾白露  
夢回猶記到釣天汝南遺老推黃憲海內諸公憶鄭虔  
萬里歸來無寸補論文慙愧到忘年

寄沈仲說

欲採芙蓉寄所思，秋江風露正離離。  
每因見月懷元度，可但看詩說項斯。  
溪上燕辭華屋早，槎頭魚上碧波遲。  
太平無事差科了，歸共原泉理釣絲。

野人籬落並江濱，竹裏流泉竹外雲。  
好學橐駝惟種樹，莫誇司馬最能文。  
小橋斜接漁樵路，落日爭呼雁鷺羣。  
獨憶詠歸亭上客，久留城府思紛紛。

次韻錢伯行白芙蓉

帝子西遊太液池一杯秋露為君持  
空令越女羞容貌不與唐昌共本支  
姪姁最憐無語處風流全在半開時  
自移長信宮中去學得班娘淡畫眉

次韻懷彥成

沙棠為漿木蘭橈別後令人瘦沈腰  
采蕺斲歸靈越去栽桃重赴武陵邀  
醉乘蓮葉春波闊夢落簷花夜雨飄  
猶記共遊鳴玉洞滿山明月聽吹簫

寄玉山

我愛玉山佳樹林草堂終歲有餘陰巢安翡翠春雲煖  
窓護芭蕉夜雨深寶篆焚香留睡鴨綵箋行墨寫來禽  
萬竿修竹休教洗日日平安報好音

次韻鄭有道喜王季野府判南歸

故人日下拜官歸河水南來似帶圍策馬遠遊天府勝  
食魚偏愛錦江肥蠶叢故國山猶在望帝荒祠鳥自飛  
萬里欲將慈母線芙蓉城裏製春衣

海榴花放客南歸喬木參雲總十圍綠蟻奉親浮臘味

黃羊充饌割秋肥恩承閩國榮三釜心切灤都望六飛  
錦里他年須報政中天風露濕朝衣

春日邵氏園池

寂寞園林帶夕暉昔年曾此戀芳菲柳塘水煖鴛鴦浴  
花徑風酣蛺蝶飛蔓草拂衣人不剪畫梁無主燕空歸  
洛陽池館闕興廢我欲春山賦采薇

十一月晦與同幕諸公登南高峰因過湖上小

集



共上南屏第一層海風吹鬢雪鬅鬢山盤地脉來天目  
城抱江流似蔣陵近郭晝行多畏虎並湖寒盡未收冰  
倚闌閑說承平事知是昆明劫外僧

次韻孟天暉郎中看潮

千古東南詫海潮摩挲強弩未全銷氣乘日月分盈縮  
聲振山河欲動搖擊楫中流歌慷慨倚闌斜日鬢飄蕭  
錢塘官酒秋仍綠更與靈胥酹一瓢

淮陰雜興

落木蕭蕭雁渡河西風嫋嫋水增波甘羅營裏秋聲急  
韓信城頭月色多淮市有魚聊可食楚山無桂不須歌  
古今無限關心事付與當年春夢婆

寄陳庶子參軍兼簡饒介之郎中

楚天漠漠水迢迢千里懷人不自聊帷幄喜聞延曲逆  
行間竊忝事嫖姚江空不采芙蓉寄歲暮惟歌桂樹招  
華蓋仙翁如見問為言髀肉近都銷

自淮安使江南舟次通州寄同幕諸公

頻年共入嫖姚幕此日先乘使者舟  
海色曉迎龍虎節天光寒動鸛鷖裘  
山川咫尺分吳楚河漢尋常近斗牛  
南鎖堰頭官柳樹春風相約繫驂驄

二十日福山港寄省院張思廉陳惟允諸友

漢將西征肅羽儀簡書日日有程期  
東溟潮上犀船發南斗星橫虎節移  
青入楚峰山點點白添吳鏡雪絲絲  
美人宴罷芙蓉署一色銀花翠壓枝

遊狼山寺

鯨波渺渺四無涯  
閭闔天低手可排  
一塔倚空凌浩劫  
兩潮爭港撼層崖  
半晴半雨龍歸海  
衝煖衝寒雁渡淮  
安得乞身依佛日  
遍尋靈迹訪齊諧

二十九日至淮安城南十五里述懷

欲向江湖覓釣磯  
此心長與事相違  
添丁未辦盧仝計  
算老空知伯玉非  
淮甸草肥宛地馬  
楚州人著漢官衣  
將軍奏罷平西捷  
還許山翁倒載歸

三月十五日由淮安使江南別同官

三月淮南柳色深  
相看去住兩關心  
鶯因求友聲逾切  
雁為離群思不禁  
芳草將春青楚甸  
暮雲含雨碧吳岑  
遂初爾有平生賦  
何事驅馳雪滿簪

### 江上客舍

曉來江上雨濛濛  
煙火蕭條客舍中  
風急最憐巢幕燕  
春寒猶滯寄書鴻  
紛紛洲渚魚鹽聚  
歷歷東南貢賦通  
萬里乾坤一羈旅  
濁醪今夕與誰同

### 江月樓

中天樓閣鬱嵯峨良夜其如水月何雪浪遠從三峽至  
露華偏傍九霄多道人宴坐脩禪觀遊子登臨聽棹歌  
曾是水晶宮裏客倚闌來此重婆娑

輓轅

遠遊重到洛陽城又向登封道上行路入輓轅秋更險  
雲收太室雨初晴千重灌木漫山碧百道飛泉繞澗鳴  
欲訪巢由渺何許空餘潁水照人清

呂梁

扁舟又向呂梁歸浩蕩中流看翠微  
濁浪滿河冰亂走黃雲垂地雪交飛  
奉身誤叱王遵馭涉世頻沾阮籍衣  
日暮不須吹短笛沙鷗猶恐未忘機

次韻荅秦文仲郭義仲聯句見寄

客路尋常江海上春光強半雨聲中  
習池無酒醉山簡蓮社有心期遠公  
香燼旋溫婆律火茶烟輕颺石楠風  
不因二仲聯詩至安得從容一笑同

偶成

武陵溪水碧灣灣窈窕幽期不可攀  
戴勝桑間飛自得王睢洲上語相關  
歌成桃葉臨流和采得蘋花帶月還  
見說荔支漿已熟不分涓滴到人間

南州五月尚兼衣白苧窓閒未脫機  
青李來禽書不至荔支盧橘賦多違  
水晶簾箔圍晴晝艾納鑪熏逗夕霏  
為問上都城裏客菖蒲花發幾時歸

賦楊花

巷南巷北晝冥冥搖蕩春風未肯停  
薄命不禁巫峽雨



前身曾化楚江萍  
已于謝女詩中見  
更向劉郎曲裏聽  
腸斷不堪回首處  
並人飛過短長亭

次錢伯行韻

五月東林水竹涼  
新荷葉小柳絲長  
且臨大令鵝羣帖  
不戀尚書雞舌香  
楚客謾誇千樹橘  
杜陵共愛百花莊  
滿天風露枇杷熟  
歸奉慈親取次嘗

次沈仲說韻

棟樹飛花雪打篷  
居人行樂四時同  
波涵大澤平如掌

雲割西山半入空，金刹遠瞻樓閣壯。  
畫船爭載綺羅紅，如何越女承恩後，不逐吳王住甬東。

寄友人

扁舟三月到江城，匹馬先尋北郭生。  
雨過小樓春寂寂，鳥啼脩竹曉嚶嚶。  
家無黃耳傳鄉信，門有蒼頭記客名。  
見說終南真可隱，臘判秋色為君清。

文殊寺高閣

何年蘭若倚崔嵬，觀閣連天罨畫開。  
澤國魚龍霜後靜，

關河鴻雁日邊回  
闌干迴遡虛空上  
歲月深從浩劫來  
自信平生愛登覽  
夕陽高處重徘徊

次韻袁仲長竹堂感興

一曲桃源憶故人  
白頭詞客最傷春  
南柯已寤平生夢  
東海曾揚幾劫塵  
綺樹鶯花從自好  
畫堂絲竹為誰陳  
不須聞此空惆悵  
且看瑤姬舞繡茵

簡鄭山人

國士文章海內傳  
丘園風雨故依然  
空聞太守延徐穉

猶喜諸生禮鄭玄官樹鶯啼初繫馬講堂雀下或銜鱸  
廣文方築招賢館肯使先生老一羶

八月十三夜汎姚城江

畫船撸鼓唱迴波皓齒青蛾不用歌好月愛看輪未滿  
清秋莫問夜如何明將織女機絲動寒恐姮娥白髮多  
天上清光應更足羽衣安得共婆娑

次韻錢伯行江上春暮

太湖之水近當門荇葉芹芽煖正繁不問主人還看竹

每逢鄰叟為開尊  
燕歸王謝江邊宅  
犬吠朱陳柳外村  
步屨春風歸去晚  
野童篝火候籬根

題玉山草堂

隱君家住玉山阿  
新製茅堂接薜蘿  
翡翠飛來春雨歇  
麝香眠處落花多  
竹枝已聽巴人調  
桂樹仍聞楚客歌  
明日扁舟入青浦  
不堪離思隔滄波

綠波亭

眼明忽見此亭新  
公子詩成思入神  
坐愛碧波千頃綠

夢回芳草一池春  
每傾鸚鵡留佳客  
欲采芙蓉寄遠人  
燕子不來秋已暮  
倚闌無語獨逡巡

柳塘春

扁舟二月傍溪行  
愛此林塘照眼明  
芳草日長飛燕燕  
綠陰人靜語鶯鶯  
臨風忽聽歌金縷  
隔水時聞度玉笙  
更待清明寒食後  
買魚沽酒荅春晴

漁莊

何處林塘好  
卜鄰清江繞  
屋淨無塵定  
巢新燕渾如客

汎渚輕鷗不避人  
楊柳作花香勝雪  
鱸魚上釣白於銀  
春風無限滄浪意  
欲向汀洲賦采蘋

秋懷奉寄玉山主人

江上秋陰十日多  
思君不見奈愁何  
風高澤國來鴻雁  
雨入汀洲落芰荷  
公子文章裁瑞錦  
佳人衣袖剪輕羅  
畫船亦欲溪頭去  
聽唱花間緩緩歌

有懷梧竹主人山陰道士雲臺外史兼簡龍門  
開士

碧梧翠竹日扶疎長夏高堂可晏居  
雪上故人時載酒山陰道士近無書  
蒼頭埽石安碁局樺子穿花奉板輿  
若見惠休須問訊碧雲詩句定何如

寄玉山兼簡匡廬外史

美人不見已三月日日相思賦角弓  
興發頗疑詩有助憂來翻訝酒無功  
未須結客遊樊上却擬移家住灤東  
與報匡廬于外史新醅宜壓荔枝紅

笠澤有懷



碧梧翠竹鬱參差  
艾納流薰繡幕垂  
瑤管隔花閒度曲  
畫屏燒燭看圍碁  
坐延太乙青藜杖  
倒著山公白接羅  
何日扁舟還蕩槳  
為判同醉習家池

將往三沙有懷玉山徵君會稽外史

海門自與碧天通  
獨馭靈槎遠向東  
一道銀潢秋浪白  
三洲金刹日華紅  
龍吹花雨慙聞法  
鳥語雲檣喜報風  
無奈思君重回首  
依依江樹送冥鴻

陳湖秋汎

平湖秋色曉蒼蒼鼓枻聲傳浦溆涼鴻雁欲來天拍水  
蒹葭初老露為霜菊荒甫里人何在鱸入松江興轉長  
不用臨流重懷古葦花菱葉滿滄浪

次韻懷華幼武

滑滑春泥滿郡城出門騎馬不堪行未能學道從緱母  
且復忘憂對麴生流水小池垂釣影春風深巷賣花聲  
停雲賦罷心如渴安得滄浪濯我纓

次韻蔡彥文寄謝省院諸公二首

西山雪後色逾妍  
拄笏相看每自憐  
豈有異才參廟略  
謾陪時俊列賓筵  
玉笙錦瑟留人醉  
翠葉銀花壓帽偏  
却笑當年潘騎省  
為誰雙鬢早皤然

此日東吳接勝遊  
風流欲與古人儔  
城南官酒春初熟  
湖上魚罾晚未收  
才愧機雲遙入洛  
功高絳灌重安劉  
謀參帷幄輸公輩  
巢父歸歟盍掉頭

送范德輝赴縉雲教諭兼簡高則誠

不逐扁舟汎五湖  
一官迢遞縉雲墟  
遺民世守軒轅鼎

博士家傳魏國書夜月定聞鄰縣鶴秋風莫憶故鄉魚  
到州為謝高書記日日相思賦索居

陸氏別業

窈窕西池一徑通赤闌如畫倚晴空風微燕雀飛塵外  
日皎龜魚在鏡中入谷謾誇盤往復卜鄰宜住漢西東  
綠陰滿地新荷發猶勝開樽勸碧筩

饒介

與虞山人勝伯陳山人惟寅談及仙遊事醉後

賦呈

冪冪松陰布網羅  
鶴巢松頂吸天河  
是何道士圍棋坐  
若箇樵夫對酒歌  
看月也知為爾好  
凭風無奈欲歸何  
送君直過橋西去  
還記垂楊葉不多

張憲

題院人畫小景

高棟層軒夜未央  
溶溶新綠漲池塘  
風輕楊柳金絲軟  
月淡梨花玉骨香  
亂唾碧茸紆曲逕  
獨循青瑣轉迴廊

千金一刻誰能買  
輸與豪家白面郎

席上得搖字

翠館行厨雪乍消  
牆頭新柳又垂條  
珊瑚枕煖人初醉  
鸚鵡籠寒舌未調  
座上綵鸞珠插鬢  
掌中飛燕玉圍腰  
海棠一夜東風軟  
落盡雲邊金步搖

嬉春

春來何處惱柔腸  
柳下人家綠瑣窓  
畫棟歌塵珠簌簌  
雕盤舞袖翠雙雙  
鼓翻芍藥雷轟座  
酒熟醪醕雪滿缸

最憶瑤芝堂下路一宵歸夢隔春江

春日

彩毫漆點新蟬翼  
奚墨雲磨舊馬肝  
月落小窓瓊佩冷  
夢回孤枕玉釵寒  
茶蘼架雪香生宴  
么鳳籠烟醉倚闌  
笑我一春長閉戶  
柳花填巷卧袁安

賦松江漁者

短棹輕舟白髮翁  
往來常在泖西東  
一篙綠水孤篷外  
九點青山落照中  
不盡春光楊柳雨  
無邊秋興蓼花風

鴟夷盛酒羊裘卧表海封齊莫論功

王氏小桃源

一簇林塘隱者棲天然畫出武陵溪  
循牆流水灣灣曲  
匝屋桃花樹樹低  
春雨閉門山犬吠  
炊烟隔竹午雞啼  
幽深直待秦人避  
但恐漁郎自路迷

留別賽景初

暖雲將雨驟陰晴四月羅衣尚未成  
萬點愁心飛絮影  
五更殘夢賣花聲  
方空越白承恩厚  
繡襦諸子照道明



自笑窮途不歸去空懷漫刺闔閭城

臨安軍前

寂歷荒城遍野蒿昔人事業已徒勞雁將秋色催歸鳥  
楓引霜花入戰袍地阻東南鄉信遠天昏西北陣雲高  
不堪屢作還家夢起向西風撫大刀

良宵

良宵情緒不堪題立遍闌干意欲迷鐵撥忽敲壺口破  
金刀頓剪燭心齊綠分楊柳湘簾細紅壓櫻桃斗帳低

彷彿第三橋畔宿月明珠樹夜烏啼

次韻贈張省史從軍南征

震天金鼓紫駝驕  
皁纛連珠畫斗杓  
甲馬魚鱗開曉日  
錦袍花萼上春潮  
枕榔雨暗湯泉溢  
茉莉風暄海瘴消  
幕下何人專草檄  
共誇謀議得張昭

陳秀民

鄮州望古北居庸諸山

古北居庸一望中  
風沙滿眼亂芙蓉  
曦車夜轉崑崙脊

華蓋陰移太乙峯  
金口水流終到海  
玉泉雲起又隨龍  
兩京形勝今如此  
可擬秦關百二重

湘鄉道中

日暮倦趨山市遠  
解衣聊復憩巖阿  
雲迷險道藤穿石  
水落懸崖草亂坡  
木客下時人迹少  
鷓鴣啼處客愁多  
向南言語憑誰辨  
莫問蠻方事若何

陳雷

早春寄周致堯

梨林致堯  
所居之地

百年身世渾如寄何處他鄉是故鄉柳態正須春弄色  
梅花自與雪生香揚雄寂寞元猶白賀監風流醉亦狂  
倘許勝緣同晚歲梨林風致即柴桑

方行

登子胥廟因觀錢塘江潮

吳越中分兩岸開怒濤千古響奔雷子胥不作忠臣死  
句踐終非霸王材歲月消磨人自老江山壯麗我重來  
鷗夷鐵箭俱安在目斷洪波萬里回

劉仁本

再往三山

去歲才從上海還今年又復戴南冠  
榕陰巷陌春風老荔子樓臺宿雨乾  
幾處舊遊重載酒十年往事一憑欄  
回頭却羨天台道有客吹簫跨玉鸞

過楓亭驛和周草庭巡檢韻就寄

餽糧千里又南征笑犯弓刀擁將星  
汗血沙塵前後騎檄書烽火短長亭  
天連閩海團團白山遶彭湖點點青

遙想環峯三十六將軍晏坐對滄溟

楊維禎

香奩八詠

并序

吳間詩社香奩八詠無春芳才情者多為題所困  
縱有篇辭鄙婦學妝院體終帶鄙狀可醜也晚得  
玉樹餘音為甲而長短句樂府絕無可拈出者一  
日雲菴王先生寄示踏莎行八闕讀之驚喜先生  
蓋松雪翁門人今年八十又三矣而堅強清爽出

語娟麗此殆為月中神仙人也謹付翠兒度腔歌  
之又評付龍洲生附八詩後梓以見王孫門中舊  
時月色雖曰喪亂固無恙也至正丙午春三月初  
吉錦窠老人楊維禎序

金盆沐髮

華青春晝賜溫泉綰脫青絲散一編翠雨亂跳花底月  
黑雲半捲鏡中天銅仙盤冷添甘露玉女盆傾拾翠鈿  
攏得雲鬟高一尺罍冠新上玉臺前

月奩勻面

一片清光照膽寒，玉容滿鏡掩飛鸞。  
素娥照見黃金闕，絳雪鎔開白玉盤。  
翠點柳尖春未透，紅生櫻顆露初乾。  
好風為我披羅幕，一朵芙蓉正面看。

玉頰啼痕

天然玉質洗鉛華，怪底偏將半面遮。  
紅滴香冰融獺髓，彩黏膩雨上梨花。  
收乾通德言難盡，點濕明妃畫莫加。  
聚得斑斑在何處，輕綃寄與薄情家。



黛眉顰色

按樂圖開列畫堂春愁何獨損清揚蜀山煙雨雙尖瘦  
漢柳風霜兩葉蒼索畫未成京兆譜欲啼先學壽陽妝  
蕭郎忽有歸期報喜得天庭一點黃

芳塵春跡

是誰步屨印微茫便似石家春滿牀  
軟雪消時痕晃底好風起處步生香  
彩雲飛上秋千鐙芳草侵來蹴鞠場  
愁絕如癡成獨立繡鴛拾得在東牆

雲窓秋夢

骨瘦魂清酒力微  
路迷錯莫是還非  
羅浮曉月相將落  
巫峽斷雲何處飛  
金彈撇來驚忽忽  
玉龍嘶了尚依依  
不如直到鈞天所  
記得霓裳樂譜歸

繡牀凝思

繡線添來日正遲  
香絨倦理一支頤  
心遊飛絮渾無著  
身蛻枯蟬忽若癡  
花幘錯描愁伴覺  
金針閣住許誰知  
絕憐小玉情緣重  
到死春蠶始絕絲

金錢卜歡

紫姑壇上祝方兄  
忽聽呼盧擲地聲  
星斗未分牛女會  
陰陽先判雨雲生  
青蚨孕子寧無兆  
玉蜨化身元有情  
寶鏡重圓三五夜  
重磨半月問虧盈

追和鮮于公寄山齋先生釣石詩

星灘分得小雙臺  
不染東華半點埃  
爽氣時從仙掌出  
青天忽見岳蓮開  
雲根遠帶桐江水  
夜雨新生海眼苔  
九朶峰前成屢憶  
不隨霜鶴寄詩來

訪倪元鎮不遇

霜滿船篷月滿天飄零孤客不成眠  
居山久慕陶弘景  
蹈海深慙魯仲連  
萬里乾坤似水一窓燈火夜如年  
白頭未遂終焉計猶欠蘇門二頃田

西湖

西湖風景開圖畫墨客騷人入咏嗟  
扇底魚龍吹日影  
鏡中鶯燕老年華  
蘇堤物換前朝柳葛嶺人耕故相家  
今古消沈一杯水兩峰長照夕陽斜

寄衛叔剛

二月春光如酒濃  
好懷每與故人同  
杏花城郭青旗雨  
燕子樓臺玉笛風  
錦帳將軍烽火外  
鳳池仙客碧雲中  
憑誰解釋春風恨  
只有江南盛小叢

賀呂希顏

雨過長江五月秋  
主家讌客林塘幽  
苦無奇字從人問  
賴有清尊消我憂  
道士舊遊尋赤壁  
美人相見憶羅浮  
休官便擬璜溪住  
蓴菜鱸魚不外求

夜宴范氏莊

南弁山間多翠微，池塘處處涵清暉。  
丹泉釀酒名千日，花樹成窠大十圍。  
童子單衣碧鶴立，美人兩袖彩鸞飛。  
臨分更作嬉春約，賸載紅船白苧衣。

題張長年雪篷

故人今在雪之濱，風雪孤篷未苦貧。  
二載溪頭見安道，一蓑江上覓元真。  
風清菰米香生夜，月白蘆花夢繞春。  
莫說江都錦帆事，蕪城煙雨正愁人。

王左轄席上夜宴

銀燭光殘午夜過  
鳳笙龍管雜鳴鼉  
佩符新賜連珠虎  
觴令嚴行卷白波  
南國遺音誇壯士  
西蠻小隊舞天魔  
醉歸不怕金吾禁  
門外一聲吹簸羅

瑠花珠月二名姬

并序

春正月廿有二日偕崑山顧仲瑛雪川鄧九成大  
梁徐師顏讌于吳城路義道家佐酒者六妹皆蘇  
臺之選內有瑠花與珠月者選中之絕也義道起

持觴屬客曰今日名姬對名客不可無作座客酒  
俱酣暢瑤花者捧硯請予題首仲瑛曰花月一對  
雖絕而彼此不無相妒題品稍偏當令偏者舉主  
人蓮花巨觥連飲之予矢口月滿十分珠有價花  
開第一玉無瑕兩姬大喜客皆起坐交觥予就醉  
矣明日足詩曰

新年春色在鄰家隊子三三聚館娃月滿十分珠有價  
花開第一玉無瑕蒲萄酒灩沈櫻顆翡翠羣翻踏月牙



老子圍紅先點筆詩成勉飲玉蓮華

寄秋淵沈鍊師

所居號琅玕所

琅玕種得三千箇箇箇瓊臺玉樹齊秋淨雙鳬清泖曲  
夜寒一虎大茅西長葺不著花猫獵深竹時聞翠羽啼  
老我所須惟鐵杖不須太乙乞青藜

翡翠巢

羅浮花使先春到來傍玉樓深處巢舞雪豔翻楊柳絮  
歌雲輕壓海棠梢屏開時露鴉頭襪絃斷應銜鳳觜膠

却笑雪衣娘太劣雕籠深鎖未全教

席上賦

蘿洞蘭煙繞燭微三更三點妓成圍魚吹綠酒常雙躍  
雁列瑤箏不獨飛隔座送闌喧中射當筵呼摻促更衣  
雞鳴樂極翻悽斷闕月纖纖照影歸

嬉春體

錢塘湖  
上作

今朝立春好天氣況是太平朝野時走向南鄰覓酒伴  
還從西墅買花枝陶令久辭彭澤縣山公祇愛習家池

宜春帖子題贈爾日日春遊日日宜

西子湖頭春色濃  
望湖樓下水連空  
柳條千樹僧眼碧  
桃花一株人面紅  
天氣渾如曲江節  
野客正是杜陵翁  
得錢沽酒勿復較  
如此好懷誰與同

楊子休官日日閒  
桐江新棹酒船還  
叮嚀舊客兼新客  
漫浪南山與北山  
好懷急就一斗飲  
佳人能作五弦彈  
君看此地經遊輦  
彷彿春風夢未殘

又湖州作

三月三日雨新晴相邀春伴冶西城即倩山妻紗帽辦  
更煩小將犢車輕好語啼春泰吉了仙姿當酒董雙成  
憑君多唱嬉春曲老子江南最有情

長城小姬如小憐紅絲新上琵琶弦可人座上三珠樹  
美酒沙頭雙玉船小洞桃花落香屑大堤楊柳掃晴烟  
明朝紗帽青藜杖更訪東林十八仙

湖州野客似元真水晶宮中烏角巾得句時過張外史  
學書不讓管夫人綦尋東老林中橘飯煮西施廟下莼

無雨無風二三月道人將客正嬉春

無題效商隱體

主家院落近連昌燕子歸來舊杏梁  
金埒近收青海駿錦籠初教雪衣娘  
卷衣甲帳春容曉吹笛西樓月色涼  
今夜阿鴻新進劇黃金小帶荔枝褰

二月皇都花滿城美人多病苦多情  
一雙孔雀銜青綬十二飛鴻上錦箏  
酒掬珍珠傳玉掌羹分甘露倒銀罍  
不堪容易少年事爭遣狂夫作後生

夜坐

雨過虛亭生夜涼  
朦朧素月照芳塘  
螢穿濕竹流星暗  
魚動輕荷墜露香  
起舞劉琨肝膽在  
驚秋潘岳鬢毛蒼  
候蟲先報砧聲近  
不待萸鱸憶故鄉

多景樓

極目心情獨倚樓  
荻花楓葉滿江秋  
地雄吳楚東南會  
水接荆揚上下流  
鐵甕百年春雨夢  
銅駝萬里夕陽愁  
西風歷歷來征雁  
又帶邊聲過石頭

春日有懷玉山主人

梨花枝外雨冥冥宿酒朝來尚未醒倚砌宜男偏婀娜  
隔窓鸚鵡太丁寧紫鸞簫管和瑤瑟金鴨香爐倚繡屏  
青李來禽臨已徧定從白鵠授黃庭

次韻奉荅倪元鎮

坐斷深林事不聞西窓風日愛餘曛舊經高赤尋三傳  
新詠山王削五君翠篠侵牀落蒼雪石池洗硯動元雲  
東鄰書屋最相憶莫遣草堂移浪文

贈王蒙

一夜西郊春草生  
草堂吹笛夜挑燈  
塞雁北飛千里雪  
吳波綠泮五湖水  
杜陵詩句花無賴  
張緒風流柳不勝  
莫遣檢書并看劍  
自將鵝帖寫溪藤

御選元詩卷五十四